

說郛

正百十九

12
6
115



112
6
115



說郭目錄

身第一百十九

雲仙雜記 一

馮贄

雜記 二

雜記 三

雜記 四

雜記 五

雜記 六

雜記 七



說郭目錄

身第一百十九

雜記 八

雜記 九

雜記 十

雲仙雜記卷一

唐 馮贄

幽人筆

司空圖隱於中條山芟松枝為筆管人問之曰幽人

筆正當如是 汗漫錄

飛雲履

白樂天燒丹于廬山草堂作飛雲履玄綾為質四面以素綃作雲朶染以四選香振履則如烟霧樂天着示山中道友曰吾足下生雲計不久上升朱府矣 樵人



直說

○孫登琴

孫登琴遇雨必有響如刃物聲竟因陰雨破作數截

有黑蛟踊去 金徽變化篇

碁聲與律呂相應

元頤本棋枰聲與律呂相應蓋用響玉為盤非有異

術也 棋天洞覽

紅白二墨

楚王靈夔使人造紅白二墨為戲及書寫衣服黑衣

用白書白衣用紅書自成一家 大唐龍髓記

龍耳李

崔奉國家一種李肉厚而無核識者曰天罰乖龍必

割其耳耳血墮地故生此李 琴莊美事

溜黃椀

元載飲食冷物用溜黃椀熱物用泛水羹器器有二

千事 出樞要錄

夢裁錦

蕭穎士少夢有人授紙百番開之皆是繡花又夢裁

雲仙雜記 卷一
錦因此文思大進 出文筆襟喉

無塵子

方鎔隱天門山以櫻櫚葉拂書號曰無塵子月以酒

脯祭之 出高士春秋

惜春御史

穆宗每宮中花開則以重頂帳蒙蔽欄檻置惜春御

史掌之號曰括香 玉塵集

黑松使者

元宗御案墨曰龍香劑一日見墨上有小道士如蠅

而行上叱之即呼萬歲曰臣即墨之精黑松使者也

凡世人有文者其墨上皆有龍賓十二上神之乃以

墨分賜掌文官 出陶家餅餘事

○柳神九烈君

李固言未第前行古柳下聞有彈指聲固言問之應

曰吾柳神九烈君已用柳汁染子衣矣科第無疑果

得藍袍當以棗餠祠我固言許之未幾狀元及第 出

峰集

六鼻鏡生雲烟

黃巢陷京城南唐王氏有鏡六鼻常生雲烟照之則左右前三方事皆見王氏向京城照之巢寇兵甲如在目前上平都邑以映日紗囊取入禁中

出纂異記

文星典吏

杜子美十餘歲夢入令采文于康水覺而問人此水在二十里外乃往求之見鵝冠童子告曰汝本文星典吏天使汝下謫爲唐世文章海九雲誥已降可於豆壠下取甫依其言果得一石金字曰詩王本在陳芳國九夜捫之麟篆熟聲振扶桑享天福後因佩入

葱市歸而飛火滿室有聲曰邂逅穢吾令汝文而不

貴

出文覽

玄山印記

陳茂爲尚書郎每書信印記曰玄山典記又曰玄山印擣朱礬澆麝酒閑則匣以鎮犀養以透雲香印書達數十里香不斷印刻胭脂木爲之

出玄山記

水玉數珠

房次律弟子金圖十二歲時次律徵問葛洪仙籙中事以水玉數珠手節之凡兩逼近二百事琅琅誦之

雲仙雜記 卷一
不止次律賞以轉枝梨

童子通神集

○為梨花洗粧

洛陽梨花時人多携酒其下曰為梨花洗粧或至買

樹

唐餘錄

籠桶衫柿油巾

杜甫在蜀日以七金買黃兒米半籃細子魚一串籠桶衫柿油巾皆蜀人奉養之粗者

出浣花旅地志

石斧銘

玄針子得石斧銘曰天雷斧速文步敲石柱子如其

言詩如蒸雲千步千首

清異志

棠才印

張寶凡衣服綵帛皆以所任官印之白黃物以墨紅黑物以粉常曰此印賢於掌庫奴遠矣文字亦然人收寶文以有棠木印者為真

張寶就印錄

○鳳窠羣女

姑臧太守張憲使娼妓戴拂壺中錦仙裳密粉淡粧使侍閣下奏書者號傳芳妓酌酒者號龍津女傳食者號仙盤使代書札者號墨娥按香者號麝姬掌詩

藁者號雙清子諸倡曰鳳窠羣女又曰團雲隊曳雲

仙出姑臧前後記

地仙圓

號州別駕竇淝以當歸為地仙圓曰使血海增光以
棗木為杵曰號金剛骨出三堂往事

涼物

房壽六月召客坐糠竹簟凭狐文几編香藤為俎刻
椰子為杯搗蓮花製碧芳酒調羊酪造含風鮓皆涼
物也壽勸吳田以輓轡瓮田懼其深曰但見龍門溪

水濯麴蘗腸耳

出叩頭錄

○梅粧閣

郭元振落梅粧閣有婢數十人客至則拖鴛鴦櫛裙
衫一曲終則賞以糖雞卵明其聲也宴罷散九和握
香出叙開錄

洛陽歲節

洛陽人家正旦造絲雞葛燕粉荔枝正月十五日造
火蛾兒食玉梁餠寒食裝萬花輿煮楊花粥端午木
英艾酒以花絲樓閣插髻贈遺辟瘟扇乞巧使蜘蛛

結萬字造明星酒裝同心膾重九迎涼脯羊肝餅佩
瘦木符冬至煎餈綵珠戴一陽巾除夜銅刀刻門埋
小兒硯點水盆燈臘日造脂花餽

金門歲節

旃檀寺春秋二會

旃檀寺悟本詩春秋二會斂牛乳為龍華飯供獻結
綵錢為幡蓋設客以吳興鬻團糟授戒者施以般若
錢求男者解密珠璫

出僧園逸錄

搔首問青天

李白登華山落鴈峯曰此山最高呼吸之氣想通天

帝座矣恨不携謝眺驚人詩來搔首問青天耳

搔首集

清高門戶

樂天語人曰吾已脫去利名枷鎖開清高門戶但蓮

龕子母丹不知何時可成

自夔傳

午橋莊

裴令臨終告門人曰吾死無所繫但午橋莊松雲嶺

未成軟碧池繡尾魚未長漢書未終篇為可恨爾

出晉

公遺語

養硯墨筆紙

養筆以硃黃酒舒其毫養紙以芙蓉粉借其色養硯以文綾蓋貴乎隔塵養墨以豹皮囊貴乎遠濕逢溪子遵之

文房寶飾

迷香洞

史鳳宣城妓也待客以等差甚異者有迷香洞神雞枕鎖蓮燈次則交紅被傳香枕八分羊下列不相見以閉門羨待之使人致語曰請公夢中來馮垂客于鳳罄囊有銅錢三十萬盡納得至迷香洞題九迷詩於照春屏而歸

常新錄

袖裏春

元宗爲太子時愛妾號鸞兒多從中貴董逍遙微行以輕羅造梨花散藥裏以月麟香號袖裏春所至暗遺之

史諱錄

金鳳凰

周光祿諸妓掠髮用鬱金油傅面用龍消粉染衣以沈香水月終人賞金鳳凰一隻

傳芳略記

三賢松

朝真觀九星院有三賢松三株如古君子梁閣老妓

英奴以麗水囊貯香遊之不數日松皆半枯事略

芋魁遭遇

李華燒三城絕品炭以龍腦裹芋魁煨之擊爐曰芋

魁遭遇矣三賢典語

山神以豐年相報

琴叟耕鳳嶺之田以虎紋巾裹犁推之曰勞吾躬耕

山神必以豐年相報已而果然鳳翔退耕傳

縮龍臺

李神遇以楓溪鐵造縮龍臺為宴燈花燈八層間以

二縫錦標點紫菱油燃鳳縷疑尚缺文出摺撫精華

吳興米

吳興米炊之甑香白馬豆食之齒醉號國夫人厨吏

鄧連以此米擣為透花饊以豆洗皮作靈沙臛以供

翠鴛堂品物類聚記

掃露明軒

王施避巢寇入天台山主人賀理給以牛粥練裙施

謝曰公乃命司延我光景當為掃露明軒永為下吏

出芳賢傳

吞雲夢澤

張曲江語人曰學者常想胸次吞雲夢澤筆頭湧若耶溪量既并包文亦浩瀚

徵文王井

雲仙雜記卷二

○田水聲過吾師丈人

淵明嘗聞田水聲倚杖久聽歎曰秫稻已秀翠色染人時剖胸襟一洗荆棘此水過吾師丈人矣

淵明別傳

龍鬚友

郗詵射策第一再拜其筆曰龍鬚友使我至此後有貴人遺金龜并拔藥石簪咸與弟子曰可市筆三百管退而藏之貯以文錦一千年後猶當令子孫以名香禮之

龍鬚志

隱士衫

成芳隱麥林山剝苧織布為短襴寬袖之衣着以酷

酒自稱隱士衫

梁福廬陵記

俗耳鍼砭詩腸鼓吹

戴顓春携雙柑斗酒人問何之曰往聽黃鸝聲此俗

耳鍼砭詩腸鼓吹汝知之乎

高隱外書

半月履

趙廷芝安成人作半月履裁千紋布為之托以精銀

纈以絳蠟唐輔明過之奪取以貯酒已乃自飲廷芝

問之荅曰公器皿太微此履有滄海之積耳

妙豐居士安成

記

菱角巾

王鄰隱西山頂菱角巾又嘗就人買菱脫頂巾貯之

嘗未遇而歎曰此巾名實相副矣

董慎續豫章記

大鯉五色

孫願夜行橫塘見池中太魚映月吸水移時不去池

外數步有一小坎正涵北斗有蝦蟇數十共來飲啜

願異之明日汰池中惟有一大鯉身已五色復來坎

雲仙雜記 卷二
所訪求蝦蟇得三足者數十

馮玉雲金溪記

烟姿玉骨

袁豐居宅後有六株梅開時爲鄰屋烟氣所爍屋乃貧人所寄豐卽圖泥塞竈張幕蔽風久之拆去其屋歎曰烟姿玉骨世外佳人但恨無傾城笑耳卽使妓秋蟾出比之乃云可與比驅爭先然胭脂之徒正當在後

張洞林桂林志

日晴

陸展郎中見楊梅嘆曰此果恐是日精然若無蜂兒

採香誰勝難和之味卽以竹絲藍貯千枚并茶花蜜

送衡山道士

常奉真湘潭記

火筋如兩儀

朱符謂火筋如兩儀成變化不可缺一本明火師在

坐曰當以玉爲之貴能不熱

李明之衡山記

羔羊揮淚

程皓以鐵床燬肉肥膏見火則油焰淋漓皓戲言曰羔羊揮淚矣又云我以三十萬錢償鐵匠而得此奉養豈不太過

方得遠金陵記

○屋龍更衣

饒子卿隱廬山康王谷無瓦屋伐以茅茨每年一易茅謂之茅龍更衣或時雨濕致漏則以油幄承梁坐於其下初不愁歎

十三賢共注廬山記

掌有臥蛇文

傳咸掌有臥蛇文指甲上隱起花草如雕刻是以文章過人

逍遙公南康記

栗木為關

凡門以栗木為關者夜可以遠盜

從容錄

九華半臂

關文衍為散騎常侍畫九華山圖於白綾半臂號九華半臂自云令吾此身常在雲泉之內

時逢青陽記

遷官面長額有光氣

郭汾陽每遷官則面長二寸額有光氣事已乃復

隴

書

壺中景

石崇砌上就苔蘚刻成百花飾以金玉曰壺中之景不過如是

耕桑偶記

○辨琴秦楚聲

李龜年至岐王宅聞琴聲曰此秦聲良久又曰此楚聲主人入問之則前彈者隴西沈妍也後彈者揚州薛滿二妓大服乃贈之破紅綃蟾酥麩龜年自負強取妍秦音琵琶捍撥而去

辨音集

臨光宴

正月十五夜元宗於常春殿張臨光宴白鷺轉花黃龍吐水金鳧銀燕浮光洞攢星閣皆燈也奏月分光曲又撒闔江錦荔支千萬顆令宮人爭拾多者賞以

紅圈帔綠暈衫 影燈記

水松牌

李白遊慈恩寺寺僧用水牌刷以吳膠粉捧乞新詩白為題訖僧獻玄沙鉢綠英梅檀香筆格蘭縑袴紫

瓊霜 海墨徵言

泛春渠

汝陽王璉取雲夢石甃泛春渠以蓄酒作金銀龜魚浮沉其中為酌酒具自稱釀王兼翹部尚書

醉仙圖記

百花獅子

曲江賚家遊賞則剪百花裝成獅子相送遺獅子有
小連環欲送則以蜀錦流酥牽之唱曰春光且莫去
留與醉人看 曲江春宴錄

桃花紙

楊炎在中書後閣糊窗用桃花紙塗以水油取其明

甚 鳳池編

酒器九品

李適之有酒器九品蓬萊盞海川螺舞仙瓠子卮幔
捲荷金蕉葉玉蟾兒醉劉伶東溟樣蓬萊盞上有山

象三島注酒以山沒為限舞仙盞有關捩酒滿則仙
人出舞瑞香毬子落盞外 逢原記

暖香滿室如春

寶雲溪有僧舍盛冬若客至則燃薪火暖香一炷滿
室如春人歸更取餘燼 雲林異景志

啼猿生蕨

猿啼之地蕨乃多有每一聲遽生萬莖 窮幽記

買春錢

進士不第者親知供酒肉費號買春錢 承平書纂

○苦吟

孟浩然眉毫盡落裴祐袖手衣袖至穿王維至走入

醋甕皆苦吟者也

詩源指訣

蛻龍牙

取蛻龍牙一枚手握之臨局自然機變橫出

手參碁訣

碎金面碁盤

蘇尚書八十猶叅禪大瀉訪之以手拍碎金面碁盤

尚書尋有悟解

舊相禪學錄

琴價與武庫爭先

嵇康抱琴訪山濤濤醉欲剖琴曰吾賣東陽舊業以
得琴乞尚書令河輪珮玉截為徽貨所衣玉簾中單
買縮絲為囊論其價與武庫爭先汝欲剖之吾從死
矣 金徽變化篇

圍棋奪造化

王勃圍棋率下四子成一首詩勃猶詫之向人曰吾
自奪造化雖一時之間百用亦可 碁天洞覽

墨紋如履皮

墨紋如履皮磨之有油暈者一兩可染三萬筆

成老伯墨

換茶醒酒

樂天方入關齊禹錫正病酒禹錫乃餽菊苗壅蘆菹
鮮換取樂天六班茶二囊以醒酒

蠻甌志

○腸胃文章映日

元稹為翰林丞旨朝退行鐘廊時初日映九英梅隙
光射稹有氣勃勃然百僚望之豈腸胃文章映日可
見乎

常朝錄

天峯煤與綾文刺孰勝

盧杞與馮盛相遇於道各携一囊杞發盛囊有墨一
枚杞大笑盛正色曰天峯煤和針魚腦八金溪子手
中錄離騷古本比公曰提綾文刺三百為名利奴顧
當孰勝已而搜杞囊果是三百刺

大唐龍隨記

粥飼鳩

蘭先生坐琴莊食蘭香粥有鳩至堦上先生以匙擲
伺之漸進至肩遂盡此粥後日鳩以千百至先生飼
之

琴莊美事

花簪壓損帽簷

梁緒梨花時折花簪之壓損帽簷至頭不能舉

祥雲志

翡翠指環

何克妓於後閣以翡翠指環換刺繡筆克知嘆曰此物洞仙與吾欲保長年之好乃命蒼頭急以蜻蜓帽贖之

粧樓記

赤將軍

哥舒翰有馬曰赤將軍翰愛之甚常以朝章加其背曰過吾北林兒遠矣此駿馬也

馬癖記

地脂

高展為并門判官一日見砌間沫出以手撮之試塗一老吏面上皺皮頓改如少年色展以謂必神藥問承天道士荅曰此名地脂食之不死展乃發軔已無所覩

方鎮編年

胡麻啖犬

以胡麻炒啖犬則光黑而駿使獵必大獲狐兔又可得三十歲

好事集

得意田

雲陽改氏值豐年則盡取金錢埋之九里皆滿曰有

雲仙雜記卷三
得意田遂可棄無用金

豐年錄

雲仙雜記卷三

過門錢

龍山康甫慷慨不羈每日置酒於門邀留賓客不住者贈過門錢日費酒者鶴嘴餅二十

故懷集

虞永興書

有人收得虞永興與圓機書一紙剪開字字賣之礬卿一字得麻一斗鶴口一字得銅硯一枚房村一字得芋千頭隨人好之淺深

字錦

一醉六日

張麟一醉六日嚙柱幾半

醉錄

起宅刷以醇酒

蓮花巷王珊起宅畢其門刷以醇酒更散香末蓋禮

神之至

宣武盛事

題梁字

范溥題聽事梁每字以木花蓮承之歲旦一開次日

復上之

河中記

郇公厨

韋陟厨中飲食之香錯雜人入其中多飽飫而歸語

曰人欲不飯筋骨舒黃緣須入郇公厨

長安後記

厠上以木湯盥手

陳寤盛其居止厠上以木湯盥手槐板覆蔽糞穴為

都城第一

洛陽要記

書北山移文

樂大女金鑿十歲忽書北山移文示家人樂天方買

終南紫石欲開文士傳遂輟以勒之

豐寧傳

爭春館

揚州太守圃中有杏花數十畷每至爛開張大宴一

株令一倡倚其傍立館曰爭春開元中宴罷夜闌人
或云花有歎聲

揚州事迹

薛家士風

成都薛氏家士風甚美厨司以半瓠爲杓子孫就食
蝦羹肉醬一取之飯再取之

蜀普錄

食蒲桃

楊炎食蒲桃曰汝若不澁當以太原尹相授

河東備錄

梅聘海棠棖子臣櫻桃

黎舉常云欲令梅聘海棠棖子臣櫻桃及以芥嫁筭

但恨時不同耳然牡丹醪醲楊梅枇杷幸爲執友

金城記

檜生藥圓

幽燕思先驛後有五樹檜忽生藥圓試摘服之徃徃

療疾有驗

幽燕記異

過廳羊

熊飜每會客至酒半堦前旋殺羊令衆客自割隨所
好者綵綿繫之記號畢烝之各自認取以剛竹刀切
食一時盛行號過廳羊

青州雜記

軟漆纏桑枝為籬障

杜勝宅以軟漆纏桑枝編為籬障雨一過黑光照四

面時通甫愛之欲以銅官第取不應

鄴郡名錄

嚼雞舌香

飲酒者嚼雞舌香則量廣浸半天回則不醉

酒中玄

能詩

能詩之士雨泡滅則得意香烟斷而成吟

白氏金鎖

朱書禹字渡江河

渡江河者朱書禹字佩之免風濤保安吉

禹功記

盡數天星徧知棋勢

人能盡數天星則徧知棋勢

止戈集

雌雄樹

九仙殿銀井有梨二株枝葉交結宮中呼為雌雄樹

金鑿蜜記

作詩如繡花

作詩如繡花女令籠絡枝葉而已無過不及乃善

鍾嶸

句眼

化玉膏

衛玠盟面用化玉膏及芹泥故色愈明潤終不枯槁
金臺錄

貯蘭蕙

王維以黃磁斗貯蘭蕙養以綺石累年彌盛
汗漫錄

百齒梳

孫思邈以交加木造百齒梳用之養生要法也
樵人直說

科斗筋魚尾匙

向範待客有漆花盤科斗筋魚尾匙
樞要錄

唾地成文

有人謁李賀見其久而不言唾地者三俄而成文三

篇
文筆襟喉

○菖蒲當拜此君

王徽之以菖蒲映竹曰菖蒲止以九節為貴而此君
面目聳然正當再拜此君而此君亦安得不受之耶
高士春秋

○界尺筆槽

有借界尺筆槽而破其槽者白其主人曰韓直木如
常孤竹君無恙但半面之交忽然折節矣主人大笑

玉塵集

犀如意

虞世南以犀如意爬癢久之歎曰妨吾聲律半工夫
餅餘事

萱草浣衣

鄭源令婢萱草浣衣萱草輒云郎君塵土太多令人
手皮俱脫 二峯集

虎毛紅筩筆

有僦馬生甚貧遇人與虎毛紅筩筆一枚曰所須但

呵筆卽得之然夫妻之外冷一人知則殆矣時方盛
行凝烟帳風篁扇皆呵而得之一日晚思兔頭羹連
呵遽得數盤夫妻不能盡以與鄰家自是筆雖存呵
之無應 纂異記

一詩輒洗其筆

白傅每一詩輒洗其筆 文覽

句中喜得魚竹

孟浩然一日周旋竹間喜色可掬又見網師得魚尤
甚喜躍友人問之荅云吾適得句中有魚竹二物不

知竹有幾節魚有幾鱗疑致疎謬今見二物乃釋然矣
玄山記

洪兒紙

姜澄十歲時父苦無紙澄乃燒糠協竹爲之以供父
澄小字洪兒鄉人號洪兒紙
童子通袖錄

束修羊

倪若水藏書甚多列架不足疊牕安置不見天日子
弟直日看書借書者先投束修羊
唐餘錄

惠一絲兩絲

杜甫寓蜀每蠶熟卽與兒躬行而乞曰如或相憫惠

我一絲兩絲

浣花旅地志

○蕨成金釵

王鯨逢賣蕨姥黃衣破結有饑色憫之乃以千錢買
蕨姥謝而去及歸烝于烏頭甑盡成金釵蓋姥非常
人也
清異志

雞鴨卵殼

張寶嘗使子弟巡市乞雞鴨卵殼雞卵以煮藥鴨卵
以金絲縷海棠花名鮫胎盞醉後畏酒時多用之
就印

八梭綾

鄴中老母村人織綾必三交五結號八梭綾匹直米

陸筐

撫拾精華

染花奩

郭代公愛姬薛氏貯食物以散風奩收粧具以染花

奩

品物類聚記

文享媚香無忝

張說携麗正文章謁友生時正行宮中媚香號化樓

臺友生焚以待說說出文置香上曰吾文享是香無

忝

徵文玉井

○少延清歡

陶淵明得太守送酒多以春林水雜投之曰少延清

歡數日

淵明別傳

筆文章貨

羅隱喜筆工萇鳳語之曰筆文章貨也吾以一物助
子取高價即贈鴈頭牋百幅士夫聞之懷金同價或
以綵羅大組換之

龍鬚志

降龍道者

戴顓見降龍道者曰生死外人願陳三拜獻護經簾

青銅磬 芳賢傳

何徵君隱吳郡

何徵君隱吳郡多遊臨華寺九金堂飲鹿塘靈寶院

涵星澗 高隱外書

西昌逸士

郎詠隱西昌採樵為業或擔至都中人買之則曰我

西昌逸士酒中人也今獻公所闕公當惠我所好 廬陵

記

享鹿肉

黃昇日享鹿肉三斤自晨煮至日影下門西則喜曰

火候足矣如是四十年 安成記

獵蠅記室

盧記室多作脯腊夏則委人於十步肉扇上塗飭以

撲蠅脯以青紗障隔塵土時人呼為獵蠅記室 金溪記

種蔬助鼎俎

宋宇種蔬三十品時雨之後按行園圃曰天出此徒

雲仙雜記 卷三
助子鼎俎家復何患

豫章記

蓄鴨

富揚庭蓄鴨萬隻每飼以米五石遺毛覆渚

桂林記

雲仙雜記卷四

○石鼈銜賦題

高郢夜課于豐亭忽見一鼈在案上視之石也郢異其事取千題散置楮中禱祝令石鼈銜之以上來事既而石鼈舉頭乃是沙洲獨鳥賦題出果然其年首選

湘潭記

自負書劍

凌倚隱衡山往來自負書劍削竹為擔裹以烏氈倚既死山僧取以供事

衡山記

松精成使者

茅山有野人見一使者異服牽一白羊野人問居何地曰偃蓋山隨至古松下而沒松形果如偃蓋意使者乃松樹精羊乃茯苓耳

金陵記

龍窠石

中山僧表堅面多癩痕偶溪中得石如雞子夜覺凉冷信手磨面癩痕盡滅後讀博異志曰龍窠石磨瘡

癩大效

廬山記

召客念無魚

蘇蠙郎中召客無魚念曲江多有而禁釣乃令掌史

用油幕偷數頭適濟其事

承平舊集

金雞把卵時

封少卿問禪於龍華厚叅師曰金雞抱卵時如何少卿歸而默坐三年不能領解至于發狂而死

禪學錄

胡松節支琴

白傅用胡松節支琴

金徽變化篇

竊嚙碁子

李杓直與人碁而敗乃竊數子嚙之尋問乃鼓局太

怨棋天洞覽

墨染紙不昏

墨染紙三年字不昏暗者為上

成老相墨經

茶焦縛奴投火

陸鴻漸採越江茶使小奴子看焙奴失眠茶焦爍鴻

漸怒以鐵繩縛奴投火中

蠻甌志

袖餅班中

于琮班中有時袖餅而食或以遺同列

常朝記

石蓮匣

許芝有妙墨八厨巢賊亂痊于善和里第事平取之

墨已不見惟石蓮匣存

大唐龍髓記

鵝烝

蘭先生上隱亭望九里山七日不能下但食鵝烝二

十段

琴莊美事

粉指印青編

徐州張尚書妓女多涉獵人有借其書者徃徃粉指

痕並印于青編

救樓記

一里更二馬

校書郎李蟠蓄馬甚多出遊則一里更二馬借借供應可逮十家 馬癖記

旋風筆

魏博田承嗣簽治文案如流水吏人私相謂曰世罕有此旋風筆 方鎮編年

贈相得以鳩

毛傅好食鳩人與已相得者必以鳩贈之一見李翱贈十二藍 好事集

物價至微

開成中物價至微村落買魚肉者俗人買以胡絹半尺士大夫買以樂天詩一首兼之 豐年編

○夜飛蟬

杜甫每朋友至引見妻子韋侍御見而退使其婦送

夜飛蟬以助粧飾 放懷集

○羲之鬼

虞世南書冠當時人謂其有羲之鬼 字錦

竹枝曲

張旭醉後唱竹枝曲反復必至九回乃止 醉錄

却老先生

王僧虔晚年惡白髮一日對客左右進銅鑷僧虔曰
却老先生至矣庶幾乎

南康記

小兒司命

郭汾陽語子弟曰西陽庶寶方小兒之司命不可不

讀從容錄

青蠅拜賀

術士相牛僧孺若青蠅拜賀方能及第公疑之及登
科訖歸坐家庭有青蠅作八行立約數萬折射再三

良久乃去

青陽記

墓得石牌

烏重胤墓先世掘得石牌有云牛領岡前紅簫隴下
墓用丙日手板相亞重胤依而用之

壠上書

貧而圖婚

白厚貧而圖婚娶劉純材女厚送烏璫十事麩紙爲
書純材大笑荅以象田珠十升紫弱千餘頭及使家
僮撒燭花盈路厚閉門大慚賓客走去

耕桑偶記

以海駁皮爲鼓

凡鼓以海駮皮爲之泥以象骨則雄而清用雜皮則

濁而易去

辨音集駮疑是鮫字

上元影燈

洛陽人家上元以影燈多者爲上其相勝之辭曰千影萬影又各家造芋郎君食之宜男女仍云送雞肉酒用六木餅貯之於親知門前留地而去

影燈記

軟棗糕

宣慈寺每求化人先留食軟棗糕柳尚書來方食糕袖疏欲出尚書急解連帶緋袍鑰子魚袋施之

海墨微言

竊花

霍定與友生遊曲江以千金募人竊貴侯亭榭中蘭花插帽兼自持住綺羅叢中賣之士女爭買拋擲金錢又各以錐刺藕孔中者罰巨觥不中者得美饌

曲江

春宴錄

酒窟

蘇晉作曲室爲飲所名酒窟又地上每一塲鋪一甌酒計甄約五萬枚晉曰率友朋次第飲之取盡而已

醉仙圖計

詩成裁窻紙

段九章詩成無紙就窻裁故紙連綴用之九章字惠

文逢原記

○白羊糝點芳草

午橋莊小兒坡茂草盈里晉公每使數羣羊散于坡

上曰芳草多情賴此糝點也窮幽記

浮萍為鴨作茵褥

浮光多美鴨太原少尹樊千里買百隻置後池載數

車浮萍入池使為鴨作褥雲林異景志

自為小君裁剪

李紳為相時俗尚輕綃染蘸碧為婦人衣紳自為小

君裁剪鳳池編

貴家棋子

開臣中貴家以紫檀心瑞龍腦為棋子棊譚

弄葫蘆成詩

王筠好弄葫蘆每吟詠則注水於葫傾已復注若擲

之於地則詩成矣詩源指訣

好讀離騷

錢芸士好讀離騷手不暇揭忘去肉味半月如齋姑臧

接花浸酒

楊恂遇花時就花下取藥粘綴于婦人衣上微用蜜蠟兼接花浸酒以快一時之意三堂往事

挑野蔬

郭元申家貧無食春月携兒挑野蔬一日有餘三日不出叩頭錄

簇酒

平洞好酒而無資常携榼登人門每家取一盞投之

號為簇酒叙開錄

祭詩以酒脯

賈島常以歲除取一年所得詩祭以酒脯曰勞吾精神以是補之金門歲節

礮磨齋

都下寺院每歲用除礮磨是日作礮磨齋僧園逸記

歛衣

伊處士從衆人求尺寸之帛聚而服之名曰歛衣搔首

凌虛宴

齊文宣帝凌虛宴取香菌以供品味廣唐則出於石首銅官等處銅釘菌分絲菌

自慶傳

桃花醋

唐世風俗貴重葫蘆醬桃花醋照水油

晉公遺語

蟣肝龍首

毛重教授於導江春日主人宴之賦散語曰蟣肝之奉何堪龍首之攀可望主人曰吾勸以陸源鯖賞以

柳綿肝

文房寶飾

卷四

雲仙雜記卷五

筆描窻竹影

宗測樂閑靜好松竹嘗見日篩竹影上牕以筆備描之

常新錄

糖蜜莫逆交

陳昉得蜀糖輒以蜜澆之曰與蜜本莫逆交

傳芳略記

風月常新印宮人臂

明皇開元初宮人被進御者日印選以綢繆記印于臂上文曰風月常新印畢漬以桂紅膏則水洗色不

退 史諱錄

念金輪呪

敲兩耳鐺服桂心丸念金輪呪則所思之人不以存
沒是夜必夢見之 事略

水晶環渡舟

蕭整嘗登陸渾沙洲忽水漲不得下急呼村童折塵
尾水晶環與之渡舟而過 三賢典故

鳴牙餅

許康年謁劉遜贈遜鳴牙餅千枚曰雖微物也助厨

中兩日之費 退耕傳

棠棣之好

李初直遇與人相知則曰棠棣之好何以過此喜慶
倍常 叙聞錄

金蘭簿

戴弘正每得密友一人則書于編藺焚香告祖考號
為金蘭簿 宣武盛事

鴨卵成花

向聲能於鐺中以手撥鴨卵成花 河中記

燭圍

韋涉家宴使每婢執一燭四面行立人呼為燭圍

長安

後記

宴客典斟

陳無咎宴一客用一婢典斟必十二而後使滿以盡

誠敬之道

洛都要記

金牌盈座

河間王夜飲妓女謳歌一曲下一金牌席終金牌盈

座

豐盈傳

聚香團

揚州太守仲端畏妻不敢延客謝廷皓謁之坐久甚

饑端入內袖聚香團啗之

揚州事迹

○待闕鴛鴦社

朱子春未婚先開房室帷帳甚麗以待其事旁人謂

之待闕鴛鴦社

枚樓記

笑春紅

閩中叅軍黃涉婢曰笑春紅死涉念之淚洒犀簾至

皆損壞

蜀普錄

二花

阮文姬插鬢用杏花陶溥公呼曰二花

河東備錄

三鹿郡公

袁利見為性頑獷方棠謂袁生已封三鹿郡公蓋譏其太麤疎也

幽燕記

崑崙玉盞

宇文卓方執崑崙玉盞聽左丞檀超高譚不覺墜地

青州雜記

坐間牡丹花

宋旻語常帶華藻李孺安曰時方三月坐間生無數

牡丹花矣

鄴郡名錄

杜鵑喚歸

石誼未娶聞杜鵑喚歸歎曰此物催人使歸使我何

所歸耶

金臺錄

遇河神

顧希微開成二年遇河神屈莫多曰更二千年大江所在堤岍當崩沙九里

禹功記

○口吻生花

張祐苦吟妻孥喚之不應以責祐祐曰吾方口吻生
花豈恤汝輩白氏金鎖

○贈詩勝爛黃魚

皇甫彙謁韓愈愈贈以詩彙退有言怒愈不為置酒
愈曰豈不勝以爛黃魚待汝耶續鍾嶸句眼

折筋不休

山濤酒後嘔噉折筋不休酒中玄

防風粥

白居易在翰林賜防風粥一甌剔取防風得五合餘

食之口香七日金鑿密記

食蝻蚌

鹿宜孫食蝻蚌炙於壽陽瓮中頓進數器止戈集

羣公對雪

羣公對雪尚隆之曰麪堆金井誰調湯餅吳永素曰

玉滿天山難刻珮環坐間服其韵精姑臧記

屋瓦皆鏤

余宗伯屋瓦皆鏤竅穴千百雨則散如真珠用陳留

瓦則堅而易鏤三堂往事

三年不見羊角

皮蕃去北而復來鄱陽食竹笋曰三年不見羊角哀

矣

叩頭錄

採星盆

嵇昌蓄採星盆夏月漬果則倍冷

叙聞錄

作剪刀

姑園戲作剪刀以苜蓿根粉養之裁衣則盡成墨界

不用人手而自行

搔手集

左撚巾拭面

陽華用左撚巾拭面倍有光彩

自慶傳

碑石

李輔國葬父碑石用豆屑一千團磨瑩如紫玉碑字

四面鐫葵花三百朵

晉公遺語

漬紙

以竹稍甘露和天南星漬紙一宿裁之刀去如飛

文房

寶飾

除夜歎老

裴度除夜歎老迨曉不寐爐中商陸火凡數添也

金門

節歲

印普賢象

玄裝以回鋒紙印普賢象施于四衆每歲五馱無餘
僧園逸錄

三辰酒

玄宗置麴清潭砌以銀甃泥以石粉貯三辰酒一萬
車以賜當制學士等 史諱錄

桑木根可作沉香想

裴休得桑木根曰若作沉香想之更

唯對沉

水香反作桑根想終不聞香氣諸相從心起

常新錄

○ 卑蓋能與日輪爭功

韓愈刺潮州嘗暑中出張卑蓋歸而喜曰此物能與
日輪爭功豈細事耶 傳芳略記

○ 雷門四老石

王維韜川林下坐用當門四老石燈滅則石中鑽火
事略

握麥芒刁字

牛僧孺進士時嘗麥芒刁字有繆誤隨手刪割點定

麒麟草

元和時館閣湯飲待學士者煎麒麟草鳳翔退耕傳

魚藻洞

魚朝恩有洞四壁夾安瑠璃板中貯江水及萍藻諸

色蝦號魚藻洞南康記

鼻出黃膠

賀知章忽鼻出黃膠數盆醫者謂飲酒之過從容錄

○數米而食

沈休文羸劣多病日數米而食羹不過一筋青陽記

○廬墓日影為之不移

鄧寅廬墓墳土未乾日影為之不移壠上記

飼牛以天麻飯

青齊間遇春耕則飼牛以天麻飯仍用錦縷繫于角上耕桑偶記

高麗絲結

張均妓多麗彈琵琶曲頂上有高麗絲結趙詩爭奪

致傷二指辨音集

元夜食牛肺犯天樞使

梁鄴上元後忽髮變如血卜曰元夜食牛肺犯天樞

巡使夜行禱謝可免

影燈記

菖蒲成獅子鸞鳳狀

僧普寂大好菖蒲房中以菖蒲種成獅子鸞鳳仙人

之狀

海墨微言

鴨肝猪肚

王縉飲酒非鴨肝猪肚筋輒不舉

醉仙圖記

吞花臥酒

虞松方春以謂握月擔風且留後日吞花臥酒不可

過時

曲江春宴錄

○庭椿不染風

盧携夢人贈句曰若問登庸日庭椿不染風初不解

其言後數年携拜相庭下古椿一株雖狂風驟雨不

濕不搖

鳳池編

屋竅如七星

鄭廣文屋室破漏自下望之竅如七星

逢原記

日用斗麩爲糊以供緘封

順宗時劉禹錫干預大權門吏接書尺日數千禹錫
一一報謝綠珠盆中日用麪一斗為糊以供緘封

宣武

盛事

麪如棗核而中空

揚埏游王鉷家食一物如棗核中空其實麪也埏詢

其法供笑而不言

河中記

雲仙雜記卷六

讀書數真珠以記

于授幼時家以綠真珠勝為簾押授讀書數真珠以

記日輒一遍

長安後記

竹粉湯

夏侯鉞謁盧懷慎坐終日得竹粉湯一盞

洛都要記

蜀中厚朴

蜀中厚朴若酒後采之紫色蕩散用輒無力

窮幽記

碎錦坊

晉公午橋莊有文杏百株其處立碎錦坊 曹林異景

百年歌

李觀作百年歌王湜請其法觀向湜彈指曰遺子瓜

甲清塵庶幾文思有加 詩源指訣

夢青龍吐棋經

王積薪夢青龍吐棋經九部授已其藝頓精 出碁訣

白眼蜂

蠶退之後多為乾腊貨之開元中春末兩市多白眼

蜂如山市人以此卜絲帛之豐歉 豐寧傳

安石榴

李漢碎胡瑪瑙盤盛送王莒曰安石榴莒見之不疑

既食乃覺 揚州事迹

嗜鴨腊

彭几嗜鴨腊未曝前三日置鎮石之下時所共服 蜀音

錄

壬癸席

申王謂猪既供飡不宜處於穢處乃以檀龕粟粥待
之取其毛刷淨令巧工織壬癸席滑而且涼 河東備錄

○歛諸妓釵鈿以記意

金城多美妓賀蘭劔曰吾既臨人私情難展遇宴飲

則歛奪諸妓鈿退以記金城記

沈秘景符

禹導河之際沈秘景符以鎮五千之水患後人賴焉

禹功記

沙上玩味成詩

柳宗元吟春水如藍詩久之不成乃取九脚床於池

邊沙上玩味終日僅能成篇白氏金鎖

吟詩落齒

謝靈運半日吟詩百篇頓落十二齒續鍾嶸句

綠牝鞍

處士富麟翁從縣令芮通源游蘭居寺通源給以綠

牝鞍幽燕記異

鳳眼

龍道千卜室于積玉坊編藤作鳳眼牕支床用薜荔

千年根炊飯酒沈水浸酒取山鳳髓青州雜記

巨栗殼爲盃

鄴中產巨栗脫其殼可以爲盃

鄴郡名錄

眉分九聚

朱泚眉分九聚相者告以大貴泚信之

金臺錄

洞天餅

虢國夫人就屋梁上懸鹿腸於半空筵宴則使人從

屋上注酒於腸中結其端欲飲則解開注于盃中號

洞天聖酒將軍又曰洞天餅

酒中玄

賜成象殿茶果

金鸞故例翰林當直學士春晚困則日賜成象殿茶

果

金鸞密記

冰雪至夏價等金璧

長安冰雪至夏月則價等金璧白少傅詩名動於閩

閩每需冰雪論筐取之不復償價日日如是

止戈集

蛙臺

桂林風俗日日食蛙有來中朝爲御史者朝士戲之

曰汝之居非烏臺乃蛙臺也御史荅曰此非蛙名圭

虫而已然較圭虫之奉養豈不勝於黑面郎哉黑面

郎謂猪也朝士大赧而退

永平舊纂

○棄官求道

丁繫自尚書郎參靈度禪師棄官修道日食脫粟二升諸僧鉢水一盂夏月夜禪雖飛蚊啞食終不搖動坐夏既滿面為破爛

舊相禪學錄

携琴就松風澗響之間

段由夫携琴就松風澗響之間曰三省皆自然之聲正合類聚羊曇節以金縷羊要之曲終不去

金徽變化篇

○出遊必携圍碁短具

王積薪每出遊必携圍碁短具畫紙為局與碁子并

盛竹筒中繫于車轅馬鬣間道上雖遇匹夫亦與對手勝則徵餅餌牛酒取飽而去

棋天洞覽

墨難減者萬金不換

丸墨日用之一歲磨減半寸者萬金不換然至難得

成老相墨經

收茶三等

覺林院志崇收茶三等待客以驚雷炭自奉以萱草帶供佛以紫茸香蓋最上以供佛而最下以自奉也客赴茶者皆以油囊盛餘瀝以歸

蠻甌志

笏囊笏架

會昌以來宰相朝則有笏架入禁中逐門傳送至殿前朝罷則置於架上百寮則各有笏囊親吏持之常朝

徐峯善碁

徐峯善碁段成式欲盡窮其術峯曰子若以墨後貌與我當使子過我十倍

大唐龍髓記

瞬碧侯

琴莊有溶溶軒軒前皆池地也度池得回簾磴上自

在峯蘭先生日往峯上採蕨蕨生九股以釀醋異常

守臣取進之封峯曰瞬碧侯

出莊琴美事

錢龍宴

洛陽人有妓樂者三月三日結錢為龍為簾作錢龍宴四圍則撒真珠厚盈數寸以班螺令妓女酌之仍各具數得雙者為吉妓乃作雙珠宴以勞主人又各令作餽緩帶以一丸餽舒之可長三尺者賞金菱角不能者罰酒

粧樓記

王武子好馬

王武子好馬非馬不行正旦則柳葉金障泥上元則滿月韉清明則剪水鞭重午則籠嬌鞍八月中秋則玉櫳總絡頭重陽則蟬兒鞞春秋社則塗金鞍冬至則嘶風鞞除日則藥王鞍每節日則餵馬以明紗豆薔薇草

馬癖記

鸞手校尉

錢鏐鎮吳越尊賢渴士使名畫工二三十人在沿江號鸞手校尉伺北方士子流移來者咸寫貌以聞擇清俊福厚者用之胡岳方渡江畫工以貌奏鏐見之

歎曰面有銀光奇士也即時召見

方鎮編年

剪刀麴月兒羹

柳公權以隔風紗作龍城記及入朝名品號錦樣書以進上方御剪刀麴月兒羹即命分賜

出字錦

玄祿

老子始生其母名之曰玄祿

集真記

○大雅之文

柳宗元得韓愈所寄詩先以薔薇露灌手薰玉蕤香後發讀曰大雅之文正當如是

好事集

二儀餅

開元中長安物價大減兩市賣二儀餅一錢數對胡

桃炙十金一杆 豐年錄

槐膠彈子

李少微子女頗多每朝退於亭榭散槐膠彈子數百

枚令諸小兒爭取之以為戲笑終日不倦戲已復收

于篋 於懷集

酒神

酒席之士九吐而不減其量者為酒神 醉錄

九芒珠

王武子以九芒珠穿為紉索編華架用之每月洗以

鯉魚涎 拈拾菁華

石綠鏡臺

張燕公有石綠鏡臺得自明川道士玄宗聞其有異

取以精炭十車燒之不變乃已 類聚記

○自課庵

全子栖每為文則入自課庵一文必三草及十年之

後悟其淺近必盡付於火生平凡三焚文集 徵文玉

○淵明拜火

陶淵明日用銅鉢煮粥為二食具遇發火則再拜曰非有是火何以克腹淵明別傳

○筆封九錫

薛稷為筆封九錫拜墨曹都統黑水郡王兼毛州刺史龍鬚志

○墨封九錫

稷又為墨封九錫拜為燕督護玄香太守兼亳州諸郡平章事是日墨吐異氣結成樓臺狀鄰里來觀食

久乃滅纂異

○紙封九錫

稷又為紙封九錫拜楮國公白州刺史統領萬宇軍界道中郎將事畧

○硯封九錫

稷又為硯封九錫拜離石鄉侯使持節即墨軍事長史兼鐵面尚書鳳翔退耕傳

○為花樹洗瘡止痛

郭文在山間有石榴楊梅等花為樵牧所傷殆甚賣

簪沽酒以澆花樹人問之曰為二子洗瘡止痛

芳賢傳

雲仙雜記卷七

元白兩不相下

元微之白樂天兩不相下一日同詠李花微之先成

曰葦綃開萬朶樂天乃服綃陳也葦白而綃輕

高隱外書

仙人栢葉書

郭天民巧思橫生能摺書簡反覆如栢葉狀鄉人謂

之仙人栢葉書

安成記

家庖百品

張元厚家庖百品日日不變有蔡機缸二千盛貯皆

滿 梁福廬陵記

硯中出白影珠

侯道昌因雨置龜頭硯於簷下承溜以滌之俄而滌
破硯硯中出白影珠十顆有患目者煮珠水洗之皆

愈 馮正雲金谿記

陳蕃待客

陳蕃待客拌飯以鹿脯芼羹以牛脯未嘗別為異饌

董慎續預章記

桂人好食蝦蟆

桂人好食蝦蟆仍重乾菌為糝赴食者至以餘俎包

歸遺兒女雖汚衫不耻 張洞林桂林志

霜露能染紅紫

鵝管山霜可染紫白庶潭露能染紅為天下冠恨人

無知者 常奉真相潭記

蒲桃髻

小兒髮初生為小髻十數其父母為兒女相勝之辭

曰蒲桃髻十穗勝五穗 李明之衡山詩

方囊盛金錢

富人賈三折夜以方囊盛金錢於腰間微行市中買酒呼秦聲女置宴 方德遠金陵記

千眼仙人赴東林寺

廬山遠法師命盡之日山中峯澗寺落皆見千眼仙人成隊執幡幢香花赴東林寺法師死乃止 十三賢共注廬山記

山記

洛如花

吳興山中有一樹類竹而有實似莢狀鄉人見之以問陸澄澄曰名洛如花郡有文士則生 張寶就印錄

虱念阿房宮賦

揚州蘇隱夜臥聞被下有數人齊念阿房宮賦聲緊而小急開被視之無他物惟得虱十餘其大如豆殺之即止 清異志

甲乙膏

蜀人二月好以豉雜黃牛肉為甲乙膏非尊親厚知不得而預其家小兒三年一享 浣沙聚地志

魚脊出金釵

寶曆中西陽人見釣魚師有魚腦貫黃文愛而買歸

食至脊上出金釵一隻長六寸

團沙捏成睡嵇康

房瑄少時曾至洲渚上團沙涅成睡嵇康甚有標態

見者多愛之

童子通神錄

樂音泉

強村有水方寸許人欲取之唱浪淘沙一曲即得一

盃味大甘冷村人因名曰樂音泉

玄山記

○石斧欲砍斷詩手

杜甫子宗武以詩示阮兵曹兵曹荅以石斧一具隨

使并詩還之宗武曰斧父斤也兵曹使我呈父加斤

削也俄而阮聞之曰誤矣欲子砍斷其手此手若存

天下詩名又在杜家矣

出文覽

清水郎君

司馬伯殊買得鴨卵一枚非常珍重夜猶未食夢曰

此卵乃徐龍幼子清水郎君也不殺將富殊乃放之

三峯集

徐鳳儀杖

徐鳳儀有一杖直如筆管其後每年生一節二十年

每年縮一節三月則杖之四面青赤白黑各開一花不知何木也

陶家餅餘事

○劔生神芝則天下晏清

成都朱善存家世寶一劔每生神芝則天下晏清如安史黃巢之亂劔皆吐黑烟屬天不差毫厘

玉塵集

聚芳圖百花帶

宗測春遊山谷見奇花異草則係于帶上歸而圖其形狀名聚芳圖百花帶人多效之

高士春秋

李花如飛

伍貫卿居沅陵家有李花一株月夜奴婢遙見花作

數團如飛仙狀上天去花上露水倏然作雨數千點

花亡矣

樞要錄

起藁窻上

江總為文次至吟詠得意則起藁於窻上不堪示則投置溷中久而文遂工矣

文筆襟喉

蜜浸烏梅解宿醒

陳永陽王宿醒未解則為蜜浸烏梅每啖不下二十枚清醒乃已

樵人直說

榕粉

小兒瘡痂以榕粉日傅之則易瘥而無痕

出汗漫錄

灰山

無棣有灰山山南有石竅其中二麥無數取之不極

三賢典略

嗜蛤蜊

吐突承璀嗜蛤蜊炙以鐵絲床數澆鹿角漿然後食

傳芳畧記

譚衣

穆宗以玄絹白書素紗墨書為衣服賜承幸宮人皆

淫鄙之詞詩號譚衣至廣明中猶有存者

史譚錄

三樣錢買二色酒

西門季玄造二色酒白酒中有墨花斟於器中花亦

不散其中有肝石故也崔道旅以金銀銅錢來酤曰

以我三樣錢買君二色酒欲辭得乎

常新錄

大筍中有眼睛

裴晉公於藍田得一大筍破之有三四眼睛而香美

過甚乃與爭序分食之

晉公遺語

雲仙雜記 卷一
雨點螺磨紙

治紙之昏而不染墨者用雨點螺磨紙左右三千下其病去矣

文房寶飾

沈休文多病

沈休文多病六月猶綿帽温爐食薑椒飯不爾則委頓

自慶集

盲郭璞

路巖幼病有人稱善醫禳之術巖用之不效歎曰此

盲郭璞也

搔首集

淨眼僧

傅法寺淨眼僧能用藥煮烏頭施人治百疾皆驗又以穢跡呪治疔破鐵城偈除鬼崇發無不捷

僧園逸錄

竹節中神水

重午日午時有雨則急斫一竿竹竹節中必有神水瀝取和獺肝爲圓治心腹塊聚等病

出金門歲節

釀換骨醪

憲宗采鳳李花釀換骨醪晉國公平淮西回黃袍金

餅恩賜二斗

叙聞錄

畏薯藥

李輔國大畏薯藥或人因以示之必眼中火出毛髮皆瀝血因致大病

叩頭錄

分香蓮

三堂使宅有鉤仙池一種蓮子一歲再結實子十隻其花時香兼桃梅萸菊郡人傳分香蓮不論錢

三堂往事

○雪竹搔頭

趙綸妻死遺雪竹搔頭於堦下不數日化為楊梅花朵如撒時人異之

姑臧前後記

遇棋仙

卞子京遇棋仙束帶拜金鑄紫堂仙仍坐於席上勝克之利萬不失一

手叅棋訣

焚杜甫詩飲以膏蜜

張籍取杜甫詩一帙焚取灰燼副以膏蜜頻飲之曰令吾肝腸從此改易

詩源指訣

藏盤筵於水底

白氏履道里宅有池水可泛舟樂天每命賓客繞艇以百十油囊懸酒炙沉水中隨船而行一物盡則左

右又進之藏盤筵於水底也 窮幽記

七井生涼

霍仙鳴別墅在龍門一室之中開七井皆以雕鏤木盤覆之夏月坐其上七井生涼不知暑氣

雲林異景志

雲仙雜記卷八

八角玉升

宣帝時西夷但陁國貢八角玉升夏以水澆之則無暑冬以火迫之無寒異事甚衆 逢夏記

失去周字知唐必興

則天初稱周方具告天開文有吏人見大周字上有兩仙童長二三寸執刀剗削斯須視之失去周字人知唐必復興 鳳池編

曲江春遊

曲江春遊之家以脂粉作紅燄竿上成雙挑掛夾雜
畫帶前引車馬 曲江春遊錄

毛詩卷染油代燭

倪芳飲後必有狂恠恬然不耻或以毛詩卷染油代
燭醉遊徹曉 醉仙圖記

眉睫間常化佛

清涼僧海豐苦行二十餘年人見其眉睫間常化佛
千百大如黍米往來遊行已不覺也 清涼僧海

好李花致富

終南及廬岳出好李花兩市貴侯富民以千金買種

終廬有致富者 耕桑偶記

一物如人眼睛

蕭餘上元夜於宣陽里酒盤下得一物如人眼睛其
體類美石光彩射人餘夜遊市肆閑置掌中每行黑
闇衢巷隨身光明三尺毫末可鑿後因而飛出 影燈記

造笙

初造笙每管中入荻根細沙一豆許遇吹時飛砂於
中激揚聲愈清徹近世樂工未有知者惜夫 辨音集

喬敷嗜魚

喬敷嗜魚而貧日向漁人貸食漁人送魚一斤則以白堊標門記之後日償價年律一終白堊盈門

隴上書

浮陽筍

九華小民浚池得物狀類竹根旁有一銘曰浮陽筍太古孕舉投醪缶三年不盡民不識字使人讀之試以豆一斗造醪投物其中果三年不減

時逢道士清陽記

爪甲間皆出雲煙

魏郡開成中大旱徧禱山岳或言西沈陸先生道行

精明請之必驗太守以下乃携杏酒青羊以備牲醪告于山中先生受禮訖對太守呼吸數過五指連拂之爪甲間皆出雲煙之氣惟中指氣象甚盛先生曰郡中雨得足諸縣皆獲八分亦可小稔已而其說不

評從容錄

石魚

南康有狂人周可大見魚必置數十頭食餘棄于几上人謂隨卽臭腐可大以手摩之皆爲石魚後年餘友人訪之見其紙裹石魚煨以啖客新香不異常魚

道遙公
南康記

王母惜黃中李過蟠桃

西王母居龍月城城中產黃中李花開則三影結實則九影花實上皆有黃中二字王中惜之過於蟠桃與紫陽真官博戲則以一二百枚遞分勝負

集真記

重黎盞酌水

宣武判官洪子昇延嵩山鍊師在宅值大雨階庭彌滿欲上堂戶子昇有憂色鍊師取懷中重黎盞酌水

宣武盛事

時元亨鍊真

方山道人時元亨鍊真歎世三十餘年精唾涕淚俱惜之七十髮不白走如奔馬宋先生曰吾以小術令此子三日即死乃於酒中以羊豕腦一拌啖之元亨不覺也飲罷便苦頭痛下痢明日便出如剝淨雞頭肉者二三升許又明日元亨果卒

河中記

○孫逢年好酒色老不衰

長安孫逢年日一醉無虛席妓妾曳綺羅者二百餘人晚年衰憊齒皆虫齧空虛如樓閣而舊好不衰

長安

後記

○王維居輞川地不容塵

王維居輞川宅宇既廣山林亦遠而性好溫潔地不容浮塵日有十數掃飾者使兩童專掌縛帚而有時不給洛陽要記

磁石益眼

益眼者無如磁石以為盆枕可老而不昏寧王宮中多用之豐寧傳

魚喜鹿胎香

揚州太守閻丘惠會僚友于轉沙亭集境內漁戶令曰所得魚多者有金帛之賞有一漁人以肉物作塊散懸於網上取魚培眾力凡十網得魚三千六百無甚小者眾慚而退太守詢之曰魚喜鹿胎之香適散懸者乃此物也下網召之萬魚畢聚矣揚州事迹

○降魔寺僧以名召魚

東川降魔寺僧吉祥魁梧多力受飯五鉢日夜誦經九函池中魚知其數以名召之背出水面使去即沒

蜀普

錄

并代人喜嗜麪

并代人喜嗜麪切以吳刀淘以洛酒漆斗貯之繫鼓
集老幼自以多寡取之至飽

河東備錄

○鶴識字

衛濟川養六鶴日以粥飲啖之三年識字濟川檢書
皆使鶴銜取之無差

金城記

洗心糖

茅地經冬燒去枝梗至春取土中餘根白如玉者搗
汁煎之至甘可為洗心糖

幽燕異記

桃花絲

青齊間有一種桃李盛開時垂絲至二三尺採之練
以松脂遞相纏結織成鞋履寄往都下人皆不辨何
物

青州雜記

秘密泉

甘塘社有一水方丈瑩潔春夏不竭旱則禱之應時
雨下然牛馬猪羊飲之肥澤雞鴨鴈飲之必死鄉
民緣可救旱號秘密泉

鄴郡名錄

怯夜幡

胡陽白壇寺幡斜日中有影月中無影不知何故因
號怯夜幡 金臺記

魚鱉隨世安危

大禹治水功成令江淮河海神曰魚鱉衰盛隨世安
危自此之後年必小減使其價遞增以食晚末之民
應天意也 禹功記

書冊以竹漆爲糊

凡書冊以竹漆爲糊逐葉微攤之不惟可以久存字
畫兼紙不生毛百年如新此宮中法也 白氏金鎖

真脫絲布

人之爲文語意疎慢者真脫絲布文士之病莫大乎
此 鍾嶸句眼

○入酒中沐浴使毛髮識味

石裕方明造酒數斛忽解衣入其中恣沐浴而出告
子弟曰吾平生飲酒恨毛髮未識其味今日聊以設
之庶無厚薄 酒中玄

龍口渠

翰林有龍口渠通內苑大雨之後必飄諸花蕊經由

而出有百種香色名不可盡春月尤妙 金鑿密記

口中現五色牙齒

孔叡好術藝延接方士多所傳授能口中現五色牙

齒彩色光絢一瞬即改 止戈集

李有九標

蕭瑀陳叔達於龍昌寺看李花相與香雅細淡潔密

宜月夜宜綠髮宜白酒 承平舊纂

斗盆燒乳頭香

曹務光見趙州以斗盆燒乳頭香十斤曰財易得佛

難求 舊相禪學錄

鼠精李

王侍中家堂前有鼠從地出其穴即生李樹花實俱

好此鼠精李也 好事集

猪肝中有識書

白浦民割猪肝肝中有一紙大如手色如新書云煙

蒼蒼明年無糧次年巢寇起州郡多荒 纂異記

○酒魔

常元載不飲羣僚百種強之辭以鼻聞酒氣已醉其

中一人謂可用術治之即取針挑元載鼻尖出一青
虫如小蛇曰此酒魔也聞酒即畏之去此何患元載
是日已飲一斗五日倍是

玄山記

糠市

洛陽振德坊皆貧民例享糟糠之薄賀知章目為糠

市 從容錄

品物互徵古事

房璘至人家凡閱四筵摘其品物互徵古事一切

當 河中記

雲仙雜記卷八終

雲仙雜記卷九

一杯羹三萬錢

李德裕奢侈每食一杯羹其費約錢三萬雜珠玉寶
貝雄黃朱砂煎汁爲之過三煎卽棄其滓

博異志

縑繫南山樹

明皇問富人王元寶家財多少對曰請以一縑繫陞
下南山樹南山樹盡臣縑未窮

博異志

心織筆耕

翰林盛事云王勃所至請託爲文金帛豐積人謂心

織筆耕

北里志

燕奴

有術士於腕間出彈子二丸皆五色叱令變化卽化雙燕飛騰名燕奴又令變卽化二小劍交擊須臾復爲丸入腕中

洞微志

三斗爛腸

殷洪遠云周旦腹中有三斗爛腸

金樓子

金菜玉蔬

始皇遣徐福入海求金菜玉蔬并一寸椹

無腸公子

蟹曰無腸公子龜曰先知君

駭雞犀

通天犀中有白紋如絲者置米其上以飼雞雞見驚走名駭雞犀刻爲魚形持入水水輒開

出抱朴子

天鼓

雷曰天鼓雷神曰雷公

抱朴子

虎狼稱呼五君

山中寅曰稱虞吏者虎也稱當路君者狼也稱東王

父者麋也西王母者鹿也成陽公者狐也社君者鼠也
抱朴子

鵲巢獺穴

鵲巢知風之所起獺穴知水之高下暉日知宴陰諧

知雨

暉日鵲鳥也陰諧雌也出淮南子

靈運鬚

謝靈運美鬚臨刑施南海祇洹寺為維摩詰鬚寺中

寶惜中宗時安樂公主五日鬪百草遣人取之仍剪

棄其餘

國史纂異

沒了期

錢鏐封吳越王工役大興士卒嗟怨或夜書府門曰

沒了期沒了期修城纔了又開池鏐出見之命吏書

曰沒了期沒了期春衣纔了又冬衣嗟怨頓息

五代史補

拔釘錢

趙在禮在宋州所為不法百姓苦之一日制下移鎮

永興百姓相賀曰眼中拔却釘矣可不快哉在禮聞

之上表乞還鎮朝廷許之在禮每口率錢一千號拔

釘錢遂獲百萬

同上

釜中龍

南唐時有蒼頭持龍水圖來貨或得之將練爲衣忽釜中雲蒸起見二龍騰躍穿壁而去

黃紙寫勅

正觀中太宗詔用麻紙寫勅詔高宗以白紙多出虵尚書省頒下州縣並用黃紙

食玉炊桂

蘇秦之楚三日乃得見王辭行王曰魯不少留對曰楚國食貴於玉薪貴於桂謁者難得見如鬼王難得

見如天帝臣食玉炊桂因鬼見帝王曰聞命矣

戰國
策

鵲蚌

趙且伐燕蘇代爲燕謂惠王曰臣過易水蚌方出曝而鵲啄其肉蚌合而箝其喙鵲曰今日不雨明日不雨卽有死蚌蚌曰今日不出明日不出必有死鵲兩不相舍漁者得而并之

同上

釐婦

魯人有獨處室者隣之釐婦亦獨處夜暴風雨釐婦室壞趨而託焉魯人閉戶曰男女不六十不閑居今

子幼吾亦幼是以不敢納婦曰何不學柳下惠然死
不逮門之女魯人曰下惠則可吾固不可吾將以吾
之不可學下惠之可

釐婦寡婦也
孔子家語

螳螂搏輪

齊莊公出獵有螳螂舉足將搏其輪御曰此蟲知進
而不知退不量力而輕就敵莊公曰以爲人必爲天
下勇士矣於是迴車而避之而勇士歸之

同上

銅鶴樽

韓王元嘉有一銅鶴樽背上注酒則一足倚滿則正

不滿則傾側

朝野僉載

鵲尾杓

陳思王有鵲尾杓柄長而直置之酒樽凡王欲勸飲
者呼之則尾指其人

同上

麒麟楨

唐楊炯每呼朝士爲麒麟楨或問之曰今假弄麒麟
者必修飾其形覆之驢上宛然異物及去其皮還是
驢耳無德而朱紫何以異是

同上

喙長三尺手重五斤

陸餘慶為洛州長史善論事而繆於決判時嘲之曰
說事即喙長三尺判事則手重五斤

同上

鶴鳴雞樹

鳳閣侍郎杜景儉文章知識並高遠時號鶴鳴雞樹

朝野
簽載

鳩集鳳池

王及善才行庸猥為內史號鳩集鳳池

出朝野簽載

金剛舞夜叉歌

隋諸葛昂高瓚爭為豪侈昂屈攢串長八尺餅澗丈

餘餽雇如柱酒行自作金剛舞以送之瓚復屈昂以
車行酒馬行肉確斬繪碾蒜壘自唱夜了歌以送之

朝野
簽載

金毗玉階

明光殿金玉珠璣為簾箔金毗玉階晝夜光明在桂

宮中 三輔皇圖

傳座

長安風俗元日以後遞飲食相邀號傳座

南部新書

寶苗

山中有葱下必有銀有薤下必有金有薑下必有銅
錫山中有王者木旁枝下垂謂之寶苗

築糠三尺

新羅人泛海漂墮鬼國鬼執之曰汝能與我築糠三
尺乎汝欲鼻長一丈乎其人請築久不成乃為鬼拔
其鼻如象 西陽雜俎

翻綽入水

玄宗嘗令左右提翻綽入池水中復出口向見屈原
笑臣爾遭逢聖明何亦至此 同上

龍巢翻

夷陵江或浮大木蔽塞水面土人為之龍巢翻 北夢瑣言

見李思戒

明宗不豫馮道入問因指果實曰如食桃不康他日
見李思戒 北夢瑣言

一步一計

李克用入魏博覘之城上有旗幟來往晉王曰劉鄩
一步一計更令審探果縛葛為人縛旗於上以驢負
之循城而行鄩軍遁已二日矣 同上

通神錢

張延賞判度支有獄頗冤濫公召吏嚴戒旬日須了
 明日案上有小帖子曰錢三萬貫乞不問此獄公怒
 更促之明日帖子云五萬貫公亦怒明日復見帖子
 曰錢十萬貫遂止不問所親問之公曰錢至十萬通
 神矣無不可為之事吾懼及禍不得不止也

幽閒鼓吹

九花虬

代宗時范陽貢馬額高九寸真虬龍也身被五花紋
 號九花虬後以賜郭子儀

杜陽雜編

上清珠

開元初屬賓國王貢上清珠光照一室有仙人玉女
 雲鶴搖動其中有水旱兵革之灾虔視無不應驗

同上

副急淚

宋世祖謂劉德願曰卿哭貴妃悲者當厚賞德願應
 聲慟哭撫膺擗踊涕泗交流上甚悅故用豫州刺史
 以賞之上又令醫術人羊志哭貴妃志亦嗚咽極悲
 他日有問志者曰卿那得此副急淚志曰我爾日自

哭亡妾耳

通鑑

五花館

荆南舊有五花館待賓之上地也故眩上成納詩曰
不是上台憐姓字五花賓館敢從容

南部新書

烏龍

會稽人張然滯役經年不歸婦與奴私通然養一狗
名曰烏龍後然歸奴懼事覺欲謀殺然狗注睛視奴
奴方興手烏龍盪奴奴失刀仗然取刀殺奴

絕搜神記

鬚髯如戟

山陰公主淫恣悅褚彥回以白帝帝召彥回西上閣

宿十日公主夜就之備見逼迫彥回整身而立從夕

至曉畧不移志公主謂曰君鬚髯如戟何無丈夫意

彥回曰雖不敏何敢首爲亂階

通鑑

田舍翁十斛麥

李勣入見上問之曰朕欲立武昭儀爲后褚遂良固
執以爲不可遂良旣顧命大臣事當且已乎對曰此
陛下家事何必更問外人上意遂決許敬宗宣言於
朝曰田舍翁多收十斛麥尚欲易婦况天子立后何
豫諸人事而妄生議乎

同上

雲仙雜記 卷九
赤鳳凰

后所通宮奴燕赤鳳者雄捷能超樓閣兼通昭儀十月五日宮中故事上靈女朝吹塤擊鼓連臂踏歌赤鳳凰來曲后曰赤鳳凰爲誰來昭儀曰赤鳳凰爲姊來寧爲他人乎后怒以杯擲昭儀裙曰鼠子能噬人乎昭儀曰穿其裙見其私足矣安在噬人乎帝微聞其事以問昭儀昭儀曰以漢家火德故以帝爲赤鳳帝信之大悅 趙后外傳

雲仙雜記卷十

蕤賓鐵

樂工廉郊師於曹綱綱曰教授人多矣未有此性靈弟子也郊常池上彈蕤賓調忽間芰荷間有物跳躍出岸乃方響一片有知者識是蕤賓鐵也指撥精妙致律呂相應物類相感耳 琵琶錄

截鞞留鞭

姚崇牧荊州受伐日闔境民泣撫馬首截鞞留鞭以表瞻戀 開元天寶遺事

蜂蝶慕香

都下名妓楚蓮者國香無及每出則蜂蝶相隨慕其香同上

自暖盃

內庫有青酒盃紋如亂絲其薄如紙以酒注之溫溫然有氣相次如沸湯名自暖盃同上

遊仙枕

龜茲國進一枕色如瑪瑙枕之則十洲三島四海五湖盡入夢中帝名遊仙枕同上

辟寒犀

交趾國進犀一株以金盤置於殿中暖風襲人使者曰此辟寒犀也同上

喚鐵

太白山居士郭休有運氣絕粒之術以繩繫一鐵片子鳥獸聞之即集庭下名曰喚鐵開元天寶遺事

水山

進士張彖力學有大名楊國忠用事爭詣門彖獨不往曰爾輩謂楊公之勢可倚如太山耶以吾所見乃

冰山也皎日一照則當悞人後登第爲華陰尉歎曰
丈夫有凌雲蓋世之志拘於下位若立身於矮屋中
使人擡頭不得遂拂衣長往

同上

花裯

學士許慎與親友宴花園中聚花鋪座曰吾自有花
裯何消坐具

同上

風流藪澤

長安平康坊妓女所居新進士以紅牋名紙遊其中
時謂此坊爲風流藪澤

同上

筆頭生花

李太白少夢筆頭生花後天才贍逸名聞天下

百寶欄

上賜國忠木芍藥國忠以百寶爲欄

元遺事

吸花露

貴妃每宿酒初消多苦肺熱凌晨傍花枝口吸花露

潤肺

同上

含玉嚙津

貴妃素有肉體苦熱肺渴每日含一玉魚藉其涼津

雲仙雜記 卷十
沃肺

同上

夜明枕

虢國夫人有夜明枕光照一室不假燈燭

同上

梨花

李白與人譚論皆成句讀如春葩麗藻粲於齒牙時號李白梨花之論

同上

二鶻擲卵

嘉陵江上見二鶻擲卵相上下以接之蓋習其飛也其胎教之意乎又翹羽未成躍出巢穴往往墮崖而

死其天性俊勇是亦躁進之類

山雞自愛

山雞自愛其色終日映水日眩則溺死

天心月脇

皇甫湜稱愈文曰穿天心出月脇

茗戰

建人謂闔茶爲茗戰

金鹿銀麕

天子北征曹奴之人觴天子于泮水之上賜金鹿銀

唐今有地上得銀狔金狗之類皆古賂夷狄奇貨

穆天

子傳

溫柔鄉

成帝謂合德為溫柔鄉曰吾老是鄉矣不能效武帝求白雲鄉也樊嫿賀曰陛下真得仙者合德號為婕

好

趙后外傳

六甲行厨

左慈明六甲能役鬼神坐致行厨

葛洪傳

老子僕徐甲

老子西度關關令尹喜知其非常人從之問道老子大驚舌聃然故號老聃老子耳有三漏手握十文其僕徐甲約日直百錢自隨二百年計欠七百二十萬錢甲詣關令索所欠令問老子對曰甲久應死吾以太玄清生符救之得至今日使甲張口向地符出丹書文字如新甲立成一聚枯骨令知老子神異叩頭請命復以符投骨上甲乃復生

龍牀

韓志和有道術憲宗時獻一龍牀坐則鱗鬣瓜角皆

雲仙雜言 卷一
動又於御前以蠅虎子數十人分隊舞梁州曲皆中

音節 沈珩傳

九色鳳鷁

東方朔游房林之野獲九色鳳鷁 洞冥記

懷夢草

鍾火山有香草武帝思李夫人東方朔獻帝懷之卽

夢見名懷夢草 洞冥記

青鶴

羽山之北有鳥曰青鶴聲如鍾磬世語曰青鶴鳴時

太平 拾遺記

寶井

范蠡收四方難得之貨或藏之井塹謂之寶井麗色
溢於閭房謂之游宮 拾遺記

瓊厨金穴

光武皇后弟郭况家工冶之聲不絕人謂之郭氏之
室不雨而雷東京謂况家爲瓊厨金穴

流香渠

靈帝起裏游館千間渠水遶砌蓮大如蓋長一丈其

葉夜舒畫卷名夜舒荷宮人靚粧解上衣著內服或
共裸浴西域貢茵墀香煮湯餘汁入渠號流香渠

書倉

曹曾積石爲倉以藏書名曹氏書倉

如願

有商人過清湖見清湖君君問所須商曰但乞如願
君許之果得一婢如願卽其名也商有所求悉能致
之後因正旦如願晚起商人撻之走入糞壤中不見
今人正旦以細繩繫綿人投糞掃中云乞如願

金蠶玉膾

吳都獻松江鱸魚煬帝曰所謂金蠶玉膾東南佳味
也

南部烟花記

閃電窻

帝觀書處窻戶玲瓏相望金鋪玉觀輝映溢目號爲

閃電窻

南部烟花記

--	--	--	--	--

